

Jòrgi Reboul

Tres trobo

Poudès segui voueste camin,
libro, vous leissarei passa.
N'ai pas besoun de vouésteis us,
uno outro que vous a sachu
m'encadena dedins sei bras.

Quand vous vèsi faire bouqueto
e trefouli touto faroto,
en previsien d'uno counquisto
que reviéudarié vouesto vido
estrecho, esterlo e malancòni ;

rèn que facho de counvencien,
de reglamen, de pache escur,
la pauro vido que vivès
mi prèn soucit de la flouri,
mau-grat tout, d'un tèndre poutoun :

poutoun deis uei, marco discrèto,
mirau deis amo encapitado
bello mesuro enganarello
courdello envertouiado à boudre,
sènso ganso...pèr miés desfaire !

Alor, mounto en iéu lou desi
de vous prèndre publicamen
e, davans lou mounde espanta
de noueste susarènt sagan,
faire cleirouna voueste gau !

Setèmbre 1929